

60 hektar sawah merekah

Ketiadaan air punca kering kontang, anak padi hampir mati

KHAIRIL ANWAR MOHD AMIN

ALOR PONGSU - Ketiadaan bekalan air mencukupi didakwa menjadi faktor hampir 60 hektar petak sawah di Kampung Parit Lebai Kadir, di sini kering kontang sejak dua minggu lalu.

Ketua Projek Ladang Berkelompok Padi Parit Lebai Kadir, Abdul Razak Lebai Hamid, 61, berkata, semua lokasi itu terjejas teruk disebabkan air yang sepatutnya disalurkan melalui tali air atau palong yang disediakan Jabatan Pengairan dan Saliran (JPS) kini tidak mencukupi.

Menurutnya, masalah itu mendapat perhatian Jabatan Pertanian dengan membekalkan dua pam air untuk kegunaan pesawah, namun bilangan itu tidak cukup bagi me-

nampung keperluan petani.

"Perkara ini sudah dimaklumkan kepada JPS sejak empat musim tanam padi lalu, namun sehingga kini tiada tindakan diambil.

"Saya berharap JPS dan Jabatan Pertanian segera membuat lawatan untuk melihat sendiri keadaan sawah di sini," katanya sewaktu ditemui, semalam.

Abdul Razak berkata, kegagalan pihak bertanggungjawab menyelesaikan masalah menyebabkan lebih 40 petani berdepan risiko kerugian hasil padi.

Menurutnya, agensi kerajaan terlibat sewajarnya memberi sokongan padu terhadap usaha pesawah padi mencapai pengeluaran hasil sebanyak 10 tan semusim sebagaimana disarankan Kerajaan Pusat.

"Bagaimana petani hendak mencapai sasaran sekiranya tidak mendapat sokongan penuh daripada agensi kerajaan?

"Kini, kami terpaksa mengalirkan air ke petak sawah dengan menggunakan pam air dan air hujan. Bagaimana dengan nasib petani yang tidak mempunyai pam air? Sekiranya hujan tidak turun dalam tempoh dua minggu, anak padi akan rosak sepenuhnya," katanya.

Katanya, pihak berwajib sewajarnya telah dapat mengenal pasti punca dan cara penyelesaiannya.

"Sepatutnya mereka (pihak berwajib) sentiasa memantau keadaan bukannya menunggu laporan," katanya.

Selain itu, Abdul Razak menegaskan petani mungkin akan berdepan dengan masalah makh-

luk perosak jika tiada usaha membersihkan semak samun di kiri kanan longkang dan jalan paya.

Menurutnya, kesemua pengusaha sawah padi di kampung itu nekad akan menukarkan tanaman padi kepada tanaman kelapa sawit sekiranya JPS gagal menyelesaikan masalah pengairan.

Ahli Dewan Undangan Negeri (Adun) Alor Pongsu, Datuk Sham Mat Sahat ketika dihubungi menegaskan masalah berkenaan perlu diberi perhatian segera.

"Saya akan bawa perkara ini ke pengetahuan JPS Daerah Kerian dalam masa terdekat dan meminta ia diselesaikan secepat mungkin memandangkan petani tidak mempunyai banyak masa untuk 'menyelamatkan' anak padi mereka," katanya.



Keadaan palong kering kontang menyukarkan usaha petani untuk menanam padi.